

## ԿԱՐԳ ԵՎ ՊԱՅՄԱՆՆԵՐ

### «ՖՈՐԱ» ՍՊԸ-Ի ԵՎ ՎԱՐՁԱԿԱԼԻ ՄԻՋԵՎ ՀԱՍՏԱՏՎՈՂ ՏՐԱՆՍՊՈՐՏԱՅԻՆ ՄԻՋՈՑԻ ՎԱՐՁԱԿԱԼՈՒԹՅԱՆ

*Վարձակալը, ստորագրելով Վարձակալության պայմանագիրը, ամբողջությամբ  
ընդունում է սույն Կանոններով նախատեսված պայմանները*

#### 1. ԸՆԴՀԱՆՈՒՐ ՊԱՅՄԱՆՆԵՐ

- 1.1. «Ֆորա» սահմանափակ պատասխանատվությամբ ընկերությունը (այսուհետ նաև՝ «**Ընկերություն**») կամ «**Վարձատու**») վճարի դիմաց վարձակալի (այսուհետ նաև՝ «**Վարձակալ**») ժամանակավոր տիրապետմանն ու օգտագործմանն է հանձնում տրանսպորտային միջոցը՝ առանց նրան կառավարման ու տեխնիկական շահագործման համար ծառայություններ մատուցելու (այսուհետ նաև՝ «**Գույք**»)՝ սույն կանոնների (այսուհետ նաև՝ «**Կանոններ**») և Վարձատուի ու Վարձակալի միջև կնքված վարձակալության պայմանագրի (այսուհետ նաև՝ «**Պայմանագիր**») դրույթներով սահմանված կարգով և պայմաններով:
- 1.2. Սույն Կանոններով չնախատեսված հարցերը կարգավորվում են Պայմանագրով և ՀՀ օրենսդրությամբ սահմանված կարգով:  
Սույն Կանոնները հանդիսանում են Պայմանագրի անբաժանելի մասը համարվող փաստաթուղթ: Սույն Կանոնների և Պայմանագրի դրույթների միջև հակասություն առաջանալու դեպքում գերակայում է սույն Կանոնները:

#### 2. ԱՄՐԱԳՐՈՒՄ

- 2.1. Գույքի ամրագրում իրականացնելիս պետք է Վարձատուի կողմից տրամադրվող փաստաթղթում նախապես հստակ պետք է նշում կատարվի Գույքի մոդելի, դրա շահագործման ամսաթվի, վարձակալության տրամադրման սկիզբնաժամկետի և վերջնաժամկետի վերաբերյալ տեղեկատվություն (այսուհետ նաև՝ «**Վարձակալության պայմաններ**»):
- 2.2. Անհրաժեշտության դեպքում պետք է նաև նշում կատարվի այն արժեքներն ունեցող մասին (օրինակ՝ մանկական նստատեղ), որոնցով Վարձակալը ցանկանում է, որ Վարձակալված ավտոմեքենան հագեցված լինի:

#### 3. ՊԱՅՄԱՆԱԳԻՐ

- 3.1. Վարձակալի կողմից ամրագրումն իրականացնելուց և Վարձույթի պայմանների շուրջ Վարձատուի հետ համաձայնություն ձեռք բերելուց Վարձատուի և Վարձակալի միջև կնքվում է Պայմանագիր:
- 3.2. Պայմանագիրը կնքվում է գրավոր, որոշակի ժամկետով:

- 3.3. Պայմանագրի նկատմամբ չեն կիրառվում ՀՀ քաղաքացիական օրենսգրքով (այսուհետ նաև՝ «Օրենսգիրք») անորոշ ժամկետով կնքված վարձակալության պայմանագիրը վերսկսելու մասին կանոնները:
- 3.4. Գույքը Վարձակալին է տրամադրվում սույն Կանոններով և Պայմանագրում նշված ժամկետով և պայմաններով:
- 3.5. Վարձակալության ժամկետի երկարաձգման կամ Վարձակալության պայմանների փոփոխման դեպքում կողմերը կնքում են վարձակալության նոր պայմանագիր:

#### 4. ՎԱՐՁԱԿԱԼԱԿԱՆ ՎՃԱՐՆԵՐ

- 4.1. Վարձակալը պարտավոր է վճարել Գույքի վարձակալության դիմաց՝ Պայմանագրում և/կամ Պայմանագրի անբաժանելի մասը համարվող այլ փաստաթղթերում նշված սակագների, հաշվարկների համաձայն:
- 4.2. Ընկերությունը պետք է Պայմանագրում և/կամ Պայմանագրի անբաժանելի մասը համարվող այլ փաստաթղթերում Գույքի վարձակալության հստակ գնանշում կատարի կամ որևէ կերպ նույնականացնի տվյալ Գույքին համապատասխան գնացուցակով սահմանված գումարի չափի և/կամ վերջինիս հաշվարկման կարգի վերաբերյալ:
- 4.3. Պայմանագրի գինը հաշվարկվում է ներքոնշյալ վճարների հիման վրա.
- 4.3.1. Բազային վճար,
  - 4.3.2. Ապահովագրական/փոխհատուցման վճար,
  - 4.3.3. Լրացուցիչ վճար (աքսեսուարների համար վճարվող վճար):
- 4.4. Բոլոր վճարումները կատարվում են ՀՀ դրամով և անկանխիկ եղանակով՝ Վարձատուի նշած բանկային հաշվին փոխանցում կատարելու միջոցով:
- 4.5. Վարձակալն՝ ի ապահովում իր պարտականությունների լրիվ կատարման, Պայմանագրի համաձայն Վարձատուին վճարում է ապահովագումար Պայմանագրում նշված գումարի չափով: Ապահովագումարը վերադարձվում է Վարձակալին վերջինիս կողմից Պայմանագրով սահմանված բոլոր պարտավորությունները պատշաճ կատարելու դեպքում:

#### 5. ՎԱՐՁԱԿԱԼՎԱԾ ԱՎՏՈՄԵՔԵՆԱՅԻ ՍՏԱՑՄԱՆ ԵՎ ՎԵՐԱԴԱՐՁՄԱՆ ՎԱՅՐՆ ՈՒ ԺԱՄԿԵՏԸ

- 5.1. Վարձատուն Վարձակալի ժամանակավոր տիրապետմանն ու օգտագործմանն է հանձնում Գույքը՝ Պայմանագիրը կնքելուց և Վարձակալի կողմից Պայմանագրի ամբողջ գումարը վճարելուց անմիջապես հետո կամ կողմերի միջև Պայմանագրով նախատեսված ժամկետում:
- 5.2. Գույքը Վարձատուի կողմից Վարձակալին է տրամադրվում Ընկերության գտնվելու վայրի հասցեում:
- 5.3. Կողմերի համաձայնությամբ Վարձակալի կողմից Գույքի ստացման վայրը կարող է լինել նաև այլ հասցե, քան Ընկերության գտնվելու վայրի հասցեն է:

- 5.4. Վարձակալը պարտավորվում է Գույքը վերադարձնել Վարձատուի գնտվելու վայրի հասցեում:
- 5.5. Եթե Վարձակալը, առանց Վարձատուի համաձայնության, հանձնում է Գույքը Պայմանագրով նախատեսված վերադարձի հասցեից տարբերվող այլ հասցեում, ապա Վարձակալը կրում է Ընկերության կողմից կրած փաստացի ծախսերին և վնասին համարժեք գումարի չափով գումար փոխհատուցելու պարտավորություն, ներառյալ այն ծախսերը, որոնք անհրաժեշտ են Գույքը Պայմանագրով նշված հասցե տեղափոխելու համար:
- 5.6. Գույքը Վարձատուից ստանալու ժամը հստակ նշվում է Պայմանագրում կամ Պայմանագրի անբաժանելի մասը համարվող որևէ փաստաթղթում:
- 5.7. Պայմանագրի ժամկետը հաշվարկվում է՝ հիմք ընդունելով Գույքի ստացման օրն ու ժամը: Վարձակալը պարտավոր է վերադարձնել Գույքը Պայմանագրով նախատեսված ժամկետի ավարտին՝ ժամային ճշտության պահպանմամբ: Վարձակալի կողմից Գույքի վերադարձը Պայմանագրում նշված ժամկետից 30 րոպե և ավելի ուշացնելու դեպքում հիմք է Վարձատուի կողմից Վարձակալից մեկ ամբողջ օրվա վարձավճարը գանձելու համար, եթե ավելի պակաս ժամկետ Պայմանագրով նշված չէ:

## 6. ԿՈՂՄԵՐԻ ԻՐԱՎՈՒՆՔՆԵՐՆ ՈՒ ՊԱՐՏԱԿԱՆՈՒԹՅՈՒՆՆԵՐԸ

### 6.1. Վարձատուի իրավունքները.

- 6.1.1. Վարձատուն իրավունք ունի Վարձակալից պահանջել և միաժամանակ հսկողություն սահմանել, որպեսզի Գույքն օգտագործվի Պայմանագրով և սույն Կանոններով սահմանված պայմաններին և դրա նշանակությանը համապատասխան:
- 6.1.2. Վարձատուն իրավունք ունի Վարձակալից պահանջել վաղաժամկետ լուծել Պայմանագիրը և հատուցել հասցված վնասը, եթե Վարձակալը Գույքից օգտվում է Պայմանագրով և սույն Կանոններով սահմանված պայմաններին և նշանակությանն անհամապատասխան:
- 6.1.3. Գույքի վնասման, հափշտակման/գողության կամ դրա մասերի հափշտակման/գողության դեպքում Վարձատուն իրավասու է պահումներ կատարել ապահովագումարից, ինչպես նաև գանձել ողջ ապահովագումարը: Եթե ապահովագումարը չի փոխհատուցում Պայմանագրի և սույն Կանոնների դրույթների պայմանների խախտման հետևանքով Վարձատուին հասցված վնասը, ապա Վարձակալը պարտավոր է փոխհատուցել այն չբավարարող գումարի չափով:
- 6.1.4. Վարձակալի կողմից Գույքի վերադարձը Պայմանագրում նշված ժամկետից 30 րոպե և ավելի ուշացնելու դեպքում Վարձատուն իրավունք ունի վերջինից գանձել մեկ օրվա վարձավճար:
- 6.1.5. Եթե Վարձակալը Գույքը չի վերադարձնում լրիվ լիցքավորված վիճակում, ապա Վարձատուն իրավունք ունի գանձելու 1000 դրամ յուրաքանչյուր լիտր վառելիքի դիմաց: Վարձակալը կարող է նաև նախապես վճարել Գույքի

վառելիքի բաքի ողջ տարողությամբ վառելիքի արժեքը՝ շուկայական գներով և Գույքը վերադարձնել առանց վառելիքի առկայության: Ընդ որում, եթե Գույքը վերադարձնելիս դրանում առկա կլինի վառելիք, ապա այդ դեպքում Կողմերի միջև գումարի հաշվանցում կամ Վարձակալին գումարի վերադարձ տեղի չի ունենալու:

6.1.6. Եթե Վարձակալը Պայմանագիրը դադարելուց հետո չի վերադարձրել Գույքը կամ այն վերադարձրել է ժամկետի խախտմամբ, ապա Վարձատուն իրավունք ունի պահանջել վարձավճար՝ կետանցի ամբողջ ժամանակահատվածի համար:

6.1.7. Վարձակալի կողմից Գույքն առանց տեղեկացնելու 24 ժամից ավել պահելու դեպքում Վարձատուն իրավունք ունի Գույքը համարել գողացված կամ հափշտակված և/կամ ՀՀ օրենսդրության մեկնաբանման տեսանկյունից որևէ կերպ գողացված և դիմել իրավապահ մարմիններին:

## **6.2. Վարձատուի պարտավորությունները.**

6.2.1. Վարձատուն պարտավորվում է Գույքը Վարձակալին հանձնել տեխնիկապես անթերի վիճակում, այնպիսի վիճակում, որպիսին Վարձատուն հանձնել է Վարձակալին,

6.2.2. Վարձատուն պարտավորվում է իր հաշվին իրականացնել վերանորոգումը (այդ թվում ընթացիկ և կապիտալ) և ռեգուլյար տեխնիկական սպասարկումը, եթե դրանք չեն առաջացել Վարձակալի մեղքով, կամ եթե չեն առաջացել Վարձակալի կողմից Գույքի նկատմամբ ոչ բարեխիղճ գործողությունների ընթացքում/հետևանքով:

## **6.3. Վարձակալի իրավունքները.**

6.3.1. Վարձակալն իրավունք ունի վարել միայն Պայմանագրում նշված տարածքում,

6.3.2. Վարձակալն իրավունք ունի իր իրավունքներն ու պարտականությունները փոխանցել երրորդ անձանց՝ միայն Վարձատուի նախնական գրավոր համաձայնությամբ, որը կարող է նախատեսվել Պայմանագրով կամ Պայմանագրի անբաժանելի մասը համարվող փաստաթղթով:

## **6.4. Վարձակալը պարտավորվում է.**

6.4.1. Գույքը վերադարձնել Վարձատուին Պայմանագրում նշված ժամկետում և վայրում, մաքուր վիճակում, լրիվ լիցքավորված, ինչպես նաև վարձակալության օրը կազմված հանձնման-ընդունման ակտին (եթե հանձնման-ընդունման ակտի վերաբերյալ առկա է Պայմանագրում նշում) համապատասխան ողջ կոմպլեկտավորմամբ և պատշաճ տեխնիկական վիճակում՝ հաշվի առնելով բնականոն մաշվածությունը,

6.4.2. Գույքի շահագործումից առաջ ծանոթանալ Գույքն արտադրող գործարանի կողմից մշակված Վարձակալված ավտոմեքենայի օգտագործման իրահանգներին,

- 6.4.3. Չօգտագործել Գույքը որպես քարշակ այլ տրանսպորտային միջոցների համար,
- 6.4.4. Չօգտագործել Գույքը մրցավազքերում, ուսուցման, անանցանելի ճանապարհներին վարելու, բեռնափոխադրումների, ինչպես նաև ՀՀ օրենսդրությանը հակասող որևէ այլ նպատակով, եթե Պայմանագրով նախատեսված չէ հստակ Գույքի վարձակալության նպատակ,
- 6.4.5. Ապահովել լիակատար անվնաս վիճակը Պայմանագրով նախատեսված ժամկետներում,
- 6.4.6. Վարձատուի պահանջով ժամանակին տրամադրել Գույքը տեխնիկական սպասարկման և պետական տեխնիկական վերազննումն անցնելու համար,
- 6.4.7. Իր հաշվին վճարել Գույքի կայանատեղիների համար, մեքենայի վարձակալության ընթացքում տեղի ունեցած բոլոր տուգանքներն ու այլ գանձումները: Վարձատուի կողմից այդ գումարների վճարման դեպքում Վարձակալը պարտավորվում է վերջինիս ամբողջ չափով փոխհատուցել դրանք,
- 6.4.8. Վարձակալի պահանջով ներկայացնել է իր վարորդական իրավունքը հաստատող փաստաթղթերը,
- 6.4.9. Ընկերության կողմից համապատասխան պահանջի առկայության դեպքում ի լրումն վարորդական իրավունքի, ներկայացնել նաև այլ փաստաթղթերի պատճեններ՝ Վարձակալի ինքնությունը ստուգելու նպատակով,
- 6.4.10. Պայմանագրի վաղաժամկետ դադարեցման դեպքում 2 ժամվա ընթացքում վերադարձնել Գույքը Վարձատուին,
- 6.4.11. Փոխհատուցել Գույքի կամ դրա առանձին մասերի գողության/հափշտակման, վնասվածքների կամ ոչնչացման հետևանքով առաջացած վնասը, եթե այդ փոխհատուցումը չի փոխհատուցվում ապահովագրական ընկերության կողմից, անկախ նրանից, թե վնասը ում մեղքով է հասցվել,
- 6.4.12. Չհանձնել ենթավարձակալության, ինչպես նաև փոխադրման պայմանագրեր չկնքել երրորդ անձանց հետ, եթե այլ բան նախատեսված չէ կողմերի միջև կնքվող Պայմանագրով,
- 6.4.13. Չվարել Գույքը՝ գտնվելով ալկոհոլի, թմրանյութերի կամ այլ թմրեցնող դեղամիջոցների ազդեցության տակ, ինչպես նաև վատառողջ կամ գերհոգնած վիճակում,
- 6.4.14. Չքանդել կամ չվերանորոգել Գույքը, նոր սարքավորում չտեղադրել, ինչպես նաև չիրականացնել որևէ փոփոխություն կառուցվածքի մեջ, եթե առկա չէ Վարձատուի համաձայնությունը: Այն դեպքում, եթե Վարձակալը, առանց Վարձատուի համաձայնության, քանդում, վերանորոգում կամ նոր սարքավորումներ է տեղադրում Գույքում, ապա Վարձատուն կարող է պահանջել իր կողմից մատնանշված գումարի չափով վնասի հատուցում, եթե գտնի, որ Վարձակալի կողմից կատարված վերոգրյալ գործողությունների հետևանքով Գույքը այլևս ենթակա չէ վարձակալության տրամադրման և/կամ Գույքի օգտագործման

պիտանելիության ժամկետը կրճատվել է որոշակի ժամանակահատվածով և/կամ Գույքը երրորդ անձանց վարձակալության տրամադրելու համար առաջարկվող վարձավճարի չափը զգալիորեն կրճատվել է:

6.4.15. Չհեռանալ Գույքից՝ այնտեղ թողնելով շարժիչի գործարկման բանալին, մեքենայի գրանցման փաստաթղթերն ու ապահովագրական քարտը,

6.4.16. Չփոխանցել Գույքը վարելու իր իրավունքներն ու պարտականությունները երրորդ անձանց, եթե այլ բան նախատեսված չէ Պայմանագրում:

## 7. ԺԱՄԿԵՏԻՑ ՇՈՒՏ ՊԱՅՄԱՆԱԳՐԻ ԼՈՒԾՈՒՄԸ

7.1. Պայմանագիրը երկկողմանի համաձայնությամբ լուծելու դեպքում.

7.1.1. Վարձակալի վճարած գումարը Վարձատուի կողմից չի փոխհատուցվում, եթե Պայմանագրի տևողությունը չի գերազանցում 14 օրը:

7.1.2. 14 և ավելի օրերով կնքված Պայմանագրի դեպքում, Վարձատուն փոխհատուցում է միայն 15-րդ օրվանից սկսած ավել օրերի գումարը:

7.1.3. Այդ ժամանակահատվածի ընթացքում Վարձակալի կողմից սույն Կանոնների 6.4 կետով նախատեսված խախտումների բացակայության դեպքում Վարձատուն Վարձակալին է վերադարձնում ապահովագրավճարը՝ ամբողջ չափով:

7.2. Եթե Գույքի օգտագործման և տիրապետման ժամանակ Վարձակալը խախտել է Պայմանագրով կամ սույն Կանոններով նախատեսված պայմաններից առնվազն մեկը, ապա Ընկերությունը կարող է առանց ծանուցման կամ նախազգուշացման դադարեցնել Պայմանագիրը և անմիջապես պահանջել Վարձակալից վերադարձնել Գույքը:

7.3. Կանոնների 7.2 կետի համաձայն Պայմանագիրը Վարձատուի կողմից լուծելու դեպքում Վարձատուն Վարձակալին չի վերադարձնում Պայմանագրի հետագա օրերի համար Վարձակալի կողմից արդեն իսկ վճարված վճարը:

7.4. Կանոնների 7.2 կետի համաձայն Պայմանագիրը Վարձատուի կողմից լուծելու դեպքում, ապահովագրավճարը հետ չի վերադարձվում Վարձակալին:

7.5. Եթե ապահովագումարը չի փոխհատուցում Պայմանագրի պայմանների խախտման հետևանքով Վարձատուին հասցված վնասը, ապա Վարձակալը պարտավոր է փոխհատուցել վնասի փոխհատուցման չբավարարող մասի գումարի չափով:

## 8. ԱՆՀԱՂԹԱՀԱՐԵԼԻ ՈՒԺԻ ՀԵՏԵՎԱՆՔՈՎ ՊԱՐՏԱՎՈՐՈՒԹՅՈՒՆՆԵՐԻ ԿԱՏԱՐՄԱՆ ԱՆՀՆԱՐԻՆՈՒԹՅՈՒՆ (ՖՈՐՍ-ՄԱԺՈՐ)

8.1. Պայմանագրով կամ սույն Կանոններով նախատեսված պարտավորություններն ամբողջությամբ կամ մասնակիորեն չկատարելու համար կողմերն ազատվում են պատասխանատվությունից, եթե դա եղել է անհաղթահարելի ուժի ազդեցության արդյունք, որը ծագել է Պայմանագիրը կնքելուց հետո, և որը Կողմերը չէին կարող կանխատեսել կամ կանխարգելել: Այդպիսի իրավիճակներ են երկրաշարժը, ջրհեղեղը, պատերազմը, ռազմական և արտակարգ դրություն հայտարարելը, քաղաքական հուզումները, համաճարակը, համավարակը, գործադուլները,

հաղորդակցության միջոցների դադարեցումը, պետական մարմինների ակտը և այլն, որոնք անհնարին են դարձնում Պայմանագրով և սույն Կանոններով սահմանված պարտավորությունների կատարումը: Եթե արտակարգ ուժի ազդեցությունը շարունակվում է Պայմանագրով սահմանված ժամկետի 1/3-րդ մասից ավելի, ապա կողմերից յուրաքանչյուրն իրավունք ունի լուծել Պայմանագիրը՝ այդ մասին նախապես 1 օր առաջ տեղյակ պահելով մյուս Կողմին:

## 9. ԿՈՂՄԵՐԻ ՊԱՏԱՍԽԱՆԱՏՎՈՒԹՅՈՒՆԸ

**9.1.** Գույքով, դրա մեխանիզմներով, համասարքերով երրորդ անձանց պատճառված վնասի համար, ՀՀ օրենսդրությամբ սահմանված կարգով, պատասխանատվությունը կրում է Վարձակալը:

**9.2.** Կողմը, որը չի կատարել կամ պատշաճ ձևով չի կատարել Պայմանագրով նախատեսված իր պարտավորությունները, պարտավոր է փոխհատուցել մյուս կողմին այդպիսով հասցված վնասը:

## 10. ԱՊԱՀՈՎՈՒԹՅԱՆ ԸՆԴՀԱՆՈՒՐ ՊԱՅՄԱՆՆԵՐ

### 10.1. Երրորդ կողմի ապահովագրություն (ԱՊՊԱ)

10.1.1. Գույքի ապահովագրությունը ներառում է Երրորդ Կողմին հասցրած վնասի փոխհատուցումը՝ առավելագույնը 1,800,000 ՀՀ դրամի չափով՝ նյութական վնասների համար: Անձնական վնասների դեպքում առավելագույն հատուցման չափն է 10,000,000 ՀՀ դրամը: Գույքը վնասվելու դեպքում, վնասի գնահատումն իրականացվելու է համաձայն վնասների գնահատման գրքույկի:

### 10.2. Ապահովագրության ամբողջական փաթեթ

10.2.1. Վնասի կամ գողության/հափշտակության դեպքում Ապահովագրության ամբողջական փաթեթը ազատում է Վարձակալին վնասված կամ գողացված/հափշտակված Գույքի վնասի փոխհատուցման պատասխանատվությունից:

**10.3.** Գույքի գողության/հափշտակման և/կամ ցանկացած տեսակի կորստի դեպքում Վարձակալը պարտավոր է.

(ա) հափշտակման/գողության մասին տեղեկանալուց հետո անմիջապես տեղեկացնել իրավապահ մարմիններին, ապահովագրական ընկերությանը և Վարձատուին,

(բ) Ապահովագրական ընկերությանը տրամադրել Գույքի գրանցման վկայականը, Գույքի վարման իրավունքի բոլոր փաստաթղթերը, Գույքի՝ Վարձատուից ստացված բոլոր բանալիների բնօրինակները, ՀՀ Ոստիկանության կողմից ստացված տեղեկանքը, որտեղ նշված կլինի Գույքի գողության/հափշտակման կամ կորստի կապակցությամբ Վարձակալի դիմելու ամսաթիվն ու ժամը:

**10.4.** Ճանապարհատրանսպորտային պատահարի (այսուհետ նաև՝ «ՃՏՀ») արդյունքում Գույքի վնասման դեպքում դրան հասցրած վնասի գնահատումը կատարվում է ապահովագրական ընկերության կողմից:

- 10.5.** ՃՏՊ-ի արդյունքում Գույքի վնասման դեպքում դրա վերանորոգումը կատարվում է ապահովագրական ընկերության կողմից:
- 10.6.** ՃՏՊ-ի արդյունքում Գույքի վնասման դեպքում Վարձակալը պարտավորվում է.
- 10.6.1. Դեպքի վայրից անհապաղ զանգահարել ապահովագրական ընկերություն և տեղեկացնել պատահարի մասին՝ առանց ավտոմեքենան տեղաշարժելու,
  - 10.6.2. Գրանցել պատահարին մասնակից Գույքի պետհամարանիշը,
  - 10.6.3. Հարցնել պատահարին մասնակից այլ մարդկանց և վկաների անունները և հասցեները,
  - 10.6.4. Կատարել վթարում կատարվածի էսքիզագծում և հնարավորության դեպքում լուսանկարահանում,
  - 10.6.5. Տեղեկացնել ՀՀ ոստիկանությանը կամ այլ համապատասխան լիազորված մարմիններին և ստանալ պատահարի վերաբերյալ արձանագրությունը,
  - 10.6.6. Չընդունել որևէ պատասխանատվություն, մեղավորություն կամ չստորագրել նման հետևանքով որևիցե փաստաթուղթ:
- 10.7.** Ապահովագրությունը չի գործում և Վարձակալը պարտավորվում է ամբողջությամբ փոխհատուցել Վարձատուին հասցված վնասը հետևյալ դեպքերում.
- 10.7.1. Ավտովթարի պահին Վարձակալը կամ երկրորդ վարորդը գտնվել է ակոհոլի, թմրանյութերի կամ այլ թմրեցնող դեղամիջոցների ազդեցության տակ,
  - 10.7.2. Վթարը տեղի է ունեցել ապահովագրության և հակահրդեհային պաշտպանության կանոնների խախտման հետևանքով (հրդեհավտանգ նյութերի պահում և տեղափոխում),
  - 10.7.3. Գույքի վարումն իրականացվում է Վարձատուի կողմից չլիազորված և Պայմանագրում չնշված անձանց կողմից և/կամ վայրում,
  - 10.7.4. Գույքն օգտագործվել է անանցանելի վայրերում վարելու կամ ուսուցման նպատակով կամ Պայմանագրով չնախատեսված այլ նպատակներով,
  - 10.7.5. Եթե վնասված է սրահը, կախոցը և շարժիչը (բացառությամբ ՃՏՊ-ի արդյունքում առաջացած վնասվածքների),
  - 10.7.6. Ապահովագրության կանոնների համաձայն ապահովագրվող դեպքեր չհանդիսացող իրավիճակների առկայության, մասնավորապես՝ ապահովագրության կանոններով պահանջվող փաստաթղթերի չտրամադրման կամ ոչ պատշաճ ձևակերպված փաստաթղթերի տրամադրման, ՃՏՊ-ի վայրից փախուստի կամ արբածության թեստ հանձնելուց խուսափելու, ապահովագրվող դեպքի առկայության պայմանների մասին ոչ ճշգրիտ տեղեկություններ հաղորդելու դեպքում,
  - 10.7.7. Հանձնման-ընդունման ակտում նշված Գույքի լրացուցիչ սարքավորումն ապահովագրված չէ: Վարձակալը ամբողջական նյութական պատասխանատվություն է կրում լրացուցիչ սարքավորման բացակայության, վնասվելու կամ վերջինիս նկատմամբ այլ նկատողությունների պարագայում,



10.7.8. Վարձակալի կողմից Գույքին վնաս հասցնելու դեպքում վերջինս ամբողջությամբ հատուցում է վնասը:

## 11. ՎԵՃԵՐԻ ԼՈՒԾՄԱՆ ԿԱՐԳԸ

11.1. Պայմանագրից կամ սույն Կանոններից կամ դրանց վերաբերյալ ծագող ցանկացած վեճ, ներառյալ Պայմանագրի գոյությունը, վավերականությունը և դադարեցումը և/կամ արբիտրաժային դրույթը, պետք է ուսումնասիրվի և վերջնականապես որոշվի «Optimus Lex» ՍՊԸ-ի մշտական արբիտրաժային դատարանի կողմից («Արբիտրաժային դատարան»): Գործի քննությունն արբիտրաժային դատարանում իրականացվում է «Առևտրային արբիտրաժի մասին» Հայաստանի Հանրապետության օրենքի համաձայն: Վարձակալը սույնով հաստատում է, որ տեղեկացված է Արբիտրաժային դատարանում գործի քննության կարգի մասին: Արբիտրաժային դատարանի կանոնակարգը հրապարակվում է [www.optimuslex.am](http://www.optimuslex.am) կայքում՝ «Optimus Lex» ՍՊԸ-ի պաշտոնական կայքում: Վարձակալը, որ արբիտրաժային դատարանը պետք է ձևավորվի Արբիտրաժային դատարանի կանոնակարգին համապատասխան: Հայցերի քննությունն իրականացվում է գրավոր փաստաթղթերի հիման վրա՝ առանց բանավոր լսումների, բացառությամբ Արբիտրաժային դատարանի կանոնակարգով նախատեսված դեպքերի: Արբիտրաժի լեզուն հայերենն է, արբիտրաժի վայրը՝ Երևան, Հայաստան:

## 12. ԾԱՆՈՒՑՈՒՄՆԵՐ

12.1. Պայմանագրի և սույն Կանոններին համապատասխան ներկայացված ցանկացած ծանուցում պետք է կազմված լինի գրավոր ձևով և ստորագրված՝ ուղարկող Կողմի անունից գործելու համար լիազորված անձի կողմից: Այդպիսի ծանուցումը կարող է հանձնվել անձամբ, ուղարկվել փոստով՝ պատվիրված նամակով կամ փոխանցվել էլեկտրոնային կապով:

12.2. Ծանուցումը կհամարվի ստացված՝

(ա) առձեռն հանձնելու կամ պատվիրված նամակով ուղարկվելու դեպքում՝ փաստացի հանձնման ամսաթվին և ժամանակին,

(բ) էլեկտրոնային փոստով փոխանցման դեպքում՝ էլեկտրոնային ապարատով տպված փոխանցման արձանագրությամբ հաստատված ուղարկման ամսաթվին և ժամանակին, պայմանով, որ եթե էլեկտրոնային փոստով փոխանցումն իրականացվում է սովորական աշխատանքային ժամերից դուրս, ծանուցումը կհամարվի ստացված հաջորդ աշխատանքային օրվա ժամը 10:00-ին:

12.3. Պայմանագրի մի կողմը պարտավոր է սույն կետով սահմանված կարգով կամ գրավոր (թղթային) ձևով մյուս կողմին տեղեկացնի իր և՛ էլեկտրոնային փոստի հասցեի և՛ հասցեի սույն Պայմանագրում նշված փոփոխության և նոր հասցեի մասին: Հակառակ դեպքում

համապատասխան հաղորդակցության և ծանուցման ուղարկումը Պայմանագրում նշված իրենց համապատասխան հասցեին կհամարվի պատշաճ ծանուցում: